

Uunga siunnersuut: Atuarfik pillugu Inatsisartut Inatsisaata allanngortinneqarnera pillugu Inatsisartut Inatsisaat

(Qulequtaa allanngortitaq)

Ilinniartitaanermut, Kultureqarnermut Timersornermut Ilageeqarnermullu Naalakkersuisoq

Siullermeerneqarnera

Meeqqat atuarfianni atuarfik pillugu Inatsisartut Inatsissaata allanngortinneqarnissaanik Inatsisartut Inatsissaattut siunnersuut Ilinniartitaanermut, Kultureqarnermut Timersornermut Ilageeqarnermullu Naalakkersuisup Naalakkersuisooqatigiit sinnerlugit saqqummiussaanut Naleqqamiit imatut oqaaseqaateqarfigissavarput. Siunnersuutip tunngaviatigut pitsaasumik sammiveqarnera Naleqqap taperserparput. Meeqqat atuarfiat pillugu oqallinneq tassaavoq nunatsinni siunissaq pillugu oqallinneq. Taamaattumik una Inatsisartrut Inatsisissatut siunnersuut taamaammat pingaaruteqartuuvoq.

Naleraq isumaqarpoq meeqqat atuarfiat misilitsinnermut kisimi piareersarfiuassanngitsoq. Atuarfik tassaavoq meeqqat oqaatsiminnik, kinaassutsiminnik, inuiaqatigiinnut peqataasinnaanerminnik aammalu inuunermut piareersarnerminnik ineriartortitsiviattut pingaaruteqartutut sinaakkusersornera nukittorsartuartariaqartoq pitsaanerunissaalu anguniartuartariaqaripput.

Taamaattumik pitsaasutut isigaarput siunnersuummi anguniarneqarmata:

- fagit ikinnerulernissaat,
- toqqammaviumik atuartsissutit nukittorsarneqarnissaat,
- kalaallisut oqaatsitta qitiutinneqarnissaat,
- kisitsinerup pitsaanerulersinneqarnissaa,
- kiisalu inuussutissarsiornermut sammititaasunik klassinik periarfissiineq.

Tamanna Naleqqamiit ilungersuutigalugu ujartuisarsimavoq, pitsanngorsaartoqartariaqarnera pisariaqavissormat.

Kalaallit Nunaanni atuarfik kalaallit tunngavigalugit ineriartortittariaqalerparput

Naleraq erseqqissumik isumaqarpoq nunatsinni atuarfik nunat allat aaqqissuussinerinik assiliinerussanngitsoq imminut aallaaviunerulertariaqartugut

Kalaallit Nunaanni atuarfimmi nunatsinni pissutsit, nunarput inuilu pillugit, kulturerput, oqaatsivut inuussutissarsiuтивullu tunngavigalugit inerisaffigalugu ingerlanneqartariaqarpoq.

Meeqqat kalaallisut ilinniassapput. Pinngortitaq pinngortitami ilinniassavaat. Inuiaqatigiit inuiaqatigiinni peqataaffigisaminni ilinniassavaat.

Atuarneq klassimi issiaannarluni ingerlanneqartariaqanngilaq. Pingortartitaq inuuniuteqarfigisarpur ilanngullugu ingerlanneqarsinnaavoq silami, imaani, aalisarnermi, piniarnermi, sannavimmi illoqarfinni nunaqarfinnilu.

Kalaallisut oqaatsivut nukittorsarneqassapput

Naleqqami kalaallit oqaatsitta nukittuumik inissisimanissaat pingaartillugu tapersersorpaa kalaallisut oqaatsitta meeqqat atuarfianni qitiutinneqarnissaat inerisaaaffiguarnissaalu taamaammat pingaartitarigatigu siunnerfiusoq naammagisimaarparput ineriartortittuarneqarnissaanullu suliniuteqarnissaq peqataaffigissvarput.

Kalaallisut oqaatsit fagiinnaanngillat. Tassaapput kinaassutsitta uummataa aammalu inuiaqatigiittut ataatsimoorfigisatta tunngavii.

Peqatigitillugu meeqqat nunarsuarmioqataallutik unammillersinnaassapput. Taamaattumik qallunaatut tuluttullu ilinniarnissaat aamma pingaaruteqarpoq. Kisianni tunngaviusariaqarpoq kalaallisut nukittuumik aallartinneqarnissaat.

Nunaqqatitta oqaasii sanngiillisillugit nunarsuarmioqataasoqarsinnaanngilaq. Oqaaseqarnikkut nukittuunngikkaanni allanut sanngiillisoqartarpoq.

Inuussutissarsiornermut klassit pingaaruteqarput

Naleraq immikkut nuannaarutigaa 9. aamma 10. klasseni inuussutissarsiornermut sammititaasunik klassiortoqarsinnaalernissaa.

Inuusuttut amerlavallaat meeqqat atuarfianniit ingerlaqqinneq ajorput. Ilaasa teoriimik atuarneq kisiat imminut naleqqussorinngilaat. Tamanna isumaqanngilaq piginnaasakinnerusut. Piginnaasaqarput piginnaasaalu atorluarlugit inerisaasoqarnissaa aqqutissiorariaqarluinnarput naleqarput pingaartinneqarluik misigisimamera annertusartariaqarluinnarparput.

Kalaallit Nunaanni inuusuttorpassuit pikkoriffeqarput:

- Assassorlutik suliaqarnermi
- aalisarnermi
- maskiinanik suliaqarnermi
- sanalunnermi
- sullissinermi
- ingerlatsinermi.

Atuarfik taakkununga aamma aqqutissiuussisariaqartoq Naleqqamiit isumaqarfigaarput.

Kalaallit Nunaata aningaasarsiornera aalisarnermik tunngaveqarpoq. Taamaattumik inuusuttortagut aalisarnermut, imarsiornermut, teknikkimut, inuusutissarsiornermullu piareersarneqartariaqarput.

Namminersorneq Naalagaaffinngornissaq pillugu oqaluinnarata tigussaasumik tamannami angunaviangilarput nammineq inuusuttortagut inuusutissarsiuutitsinnut pingaarnarpaamut piareersarsimangikkutsigit. Peqataatinnerulertariaqarpagut periarfissiornerusariaqalerpagut katatagut amerlavallaalerput.

Oqaatsit kisimik naammangillat

Naleraq mianersoqqussuteqassaaq: allannguutit pitsaasut piviusunngortinneqartariaqarput aningaasartalersorlugit siunnerfiit piviusunngortittariaqarput. Oqaatsit kusanartut kisimik naammangillat, timatalersuineq pisariaqarluinnarpoq.

Pisariaqarput:

- ilinniartitsisut amerlanerusut
- ilinniartitsisut pikkorissarnerat
- kalaallisut ilinniartitsissutit pitsaasut
- atuartitsissutit nutaat
- kommuninut tapersersuineq
- aningaasaliinerit naleqquttut naammattut.

Kommunit akisussaaffilerneqarsinnaapput, kisianni sakkussaqartinneqanngikkunik assigiinngisitsineq annertunerulissaaq.

Naggasiut

Naleqqamiit qisumaqarpugut siunnersuut eqqortup tungaanut alloriarnerusoq, pitsaasumik inerisaasoqarpat aamalu aningaasaliinerit malinnaatinneqarpata taamaammat suliamut peqataalluta malinnaaffigiumaarparput allannguutit pappiaqqami kisimiiginnassanersut imaluunniit meeqqat ulluinnarni iluaqutigissaneraat qulakkeerinneqataaniassaaq.

Meeqqat atuarfiat kissaatigaarput:

- kalaallisut nukittoqutaaffiusoq
- kulturitsinnut qanittumik inissisimasoq
- eqqissisimanartumik ilinniarfiusoq
- piginnaasanik assigiinngitsunik ataqqinnittoq
- aamalu inuunermut piareersarfiusoq.

Taamatut Naleqqamiit oqaaseqaateqarluta siunnersuutip siunertai tapersorsorlutigit innersuussutigasagut ilanngullugit ataatsimiititaliami nalilersorluarneqarlutik suliarineqarluarnissaannik innersuussilluta oqaaseqaateqarpugut.



Kalaallit Nunaanni atuarfik allanut ilaarsiinnarfiunngitsoq pilersitigu.
Kalaallit Nunaanni atuarfik kalaallit tunngavigalugit sanarfitigu inuiaqatigiinnut
piareersarfiullui siunissami ingerlatsilersussanut aqitissiussiffiunerulersillugu tamatta
kivitseqatigiiffigitigu

Qujanaq.